

Bbaruha gya Paulo hali Bafiripi Kwanjuura

Bbaruha gigi gya Bafiripi gyahandiikiirwe Paulo, mukwenda wa Yesu Kurisito, harabirihomyaka 61 Yesu Kurisito amaari kubyalwa, Paulo buyaalingi naali munyankomo (1:1, 13). Anihirwa kubba yaagihandikiiri naali Rooma. Firipi lwali rubuga luhandu lwa isaza lya Make-dooni kandi Paulo hamweji na Sijira boobo banyakutandikisya kikyote kitebe kyabeikiriza kya Firipi (Bikorwa bya Bakwenda 16:16-40). Kiki kyokyo kinyakubba kitebe kya beikiriza kyakubanza kya Paulo kiyatandikisiirye.

Mu bbaruha gya gigi, Paulo yendeerye kusijima banywani baamwe ba mu kitebe kya beikiriza ba Kurisito kya Firipi, habwa kitembu kya sente kibaali bamusindikiri bubeegwiri nti ali mu nkomo (4:10-19).

Kyakabiri, Paulo yaakoreseerye gugu mugisa kumanyisya beikiriza ba Firipi bintu bikukwatagana na mbeera gyaamwe mu nkomo na kwekambisya Bafiripi kubba basigiku mu kwikiriza kwabu, hakati gya kurumbwa na mu mbeera zizibu zibaalingimwo. Yaatumiri Timiteo n'Epafura batwalegene bbaruha gigi aleke giboolekyeyo hali kitebe kya beikiriza aleke babatemwo kitinisa nka bahandu ba kitebe kya beikiriza (2:19-30).

Bicweka Bihandu bya mu kiki Kitabbu nka Kubihonderegeeni

- (i) Biramukyo 1:1-2
- (ii) Paulo naabaweera bya mbeera gyamwe mu nkomo 1:3—2:30
- (iii) Paulo naalamba beikiriza ba Firipi 3:1—4:9
- (iv) Bigambu byakumaliira 4:10-23

Biramukyo Kuruga hali Paulo

¹ Bbaruha gigi gikuruga hali gya Paulo na Timiteo baheereza ba Yesu, Mutongoole wa Ruhanga.

Nkugihandiikira bantu ba Ruhanga nywensei beikiririza mu Yesu, Mutongoole wa Ruhanga, beicala mu rubuga lwa Filipi, na bahandu bakulingiira kitebe kya beikiriza ba Yesu hamwenya na bahwo bakutendekwa kuheereza Ruhanga.

² Nkubendeerya businge na mbabazi biruga hali Ruhanga Bbaa weetu na Mukama weetu Yesu Kurisito.

Kusima na Kusaba

³ Buli hunkabezuka nsima Ruhanga;

⁴ kandi buli humba ninkubasabira nywensei, mbasabira nindi na kusemererwa.

⁵ Kimpa kusemererwa, nsemererwa habwakubba mwansembiri kutebya Makuru Garungi kuruga kiro kikyoy kya kubanza hmwageegwirira kudoosya na hataati.

⁶ Kandi ndi munanuku nti Ruhanga yogwo munyakutandika gugu mulimo gurungi gwa

kujunwa muli nywe, yooyo akwiza kugumalira kudoosya Kiro kya Yesu, Mutongoole wa Ruhanga, kyaliziramwo.

⁷ Nahabwakikyo kikudwa-budwi gya kwicala nimbateekerezaho mu mutima gwange. Ncala nimbateekerezaho habwakubba Ruhanga mu mbabazi zaamwe, abaheeri nywe nywenseenya nagya nindimwo nahunyaakabba nindi munyankomo, kwemeera ha mananu ga Makuru Garungi na kugatebya.

⁸ Ruhanga yooyo akusobora kumpeera bukeiso nka kunkwezegwa ninkwendya hoj kubawonaho nywe nywensej kusigikira ha ngonzi za Yesu, Mutongoole wa Ruhanga ziyampeeri.

⁹ Kandi, ndi mu kusaba nti mwicala na zizo ngonzi aleke musobore kwegu na kwetegereza kwizulu.

¹⁰ Mu ngeru gigy mu kwiza kubba nimukusobora kukomamwo ngesu zirungi zibahe kubba bantu bali na mitima misyanu batali na kakoo kudoosya ha Kiro kya Kurisito kyaliziramwo.

¹¹ Kandi de zizo ngesu, zimuli nazo habwa Yesu Kurisito, zikwiza kubaha kubba na bikoŕwa bikusijimwa mu meiso ga Ruhanga na kuleetera Ruhanga kitinjisa na kuhaariizibwa.

Paulo Naabaza ha Buhandu hwa Makuru Garungi

¹² Beikiriza ba Yesu Kurisito beira bange, hataati nkwendya mwetegereze nti kubbohwa kwange mu nkomo kuheeri bantu banene mugisa gwa kwegwa Makuru Garungi.

13 Nahabwakiyo bantu bensej ba mu kikaali na babwo basurukali balinda mukama bamaari kadei kwetegereza nti, ndi mu nkomo habwa kuheereza Kurisito.

14 Kandi, habwakubba nti ndi mu nkomo, kiki kihеeri beikiriza beira bange bakukira bunene kubba na maani gaakuweera bantu kigambu kya Ruhanga batali na kutiina kwensej.

15 Kyo kili kya mananu nti, bamwej mu babwo beikiriza beira bange batebya Makuru Garungi gakukwatagana na Kurisito mwa kwiririrya huheereza bwange na kwolokya bantu bo nka kubakunkira. Beitu bo bandi bagatebya habwa kukwataniza ngya mu kutebya Kurisito.

16 Bo babwo bakutebya Kurisito habwa kwendya kukwataniza ngya, banzendya mbe; kandi bakyegiri nti, ndi haha mu nkomo habwa kwemeera ha mananu ga Makuru Garungi.

17 Kandi bo babwo, batebya Kurisito habwa kwetoolerya byabu bankei, tibali na mananu gensej mu mitima myabu. Kintu kikubaha kukora yatyo, bakwendya kundeeteera hujune hoj kukira hubwo hundi nabwo mu nkomo.

18 Beitu gya kikyó tikili kintu kihandu hali gya! Kintu kihandu kili nti mu milingo myensej, habbe mu kubba na bigyendeerwa bya hugobya rundi mu kutebya mananu, bali mu kutebya bigambu bya Yesu Kurisito. Kandi kikyó kyokyo kikumpa kusemererwa.

19 Nsemereerwe, kubba nkyegiri nti, kuraba mu kusaba kwenyu na maani ga Mwozo Musyanu wa Yesu Kurisito, bintu byensej bimbeeriho bikwiza kundoosya ha kujunwa.

20 Nkwezegwa ninkwendya kandi nindi na kunihira nti mu mulingo gwensej ntalikora kintu kyensej kikusobora kumpa kuswara kuttebya Makuru Garungi. Beitu, nkwendya hataati na biro byensej ncale nindi mutatiro mutima aleke kimpe kuheesya Kurisito kitinisa, habbe mu kwomeera rundi mu kwitwa.

21 Gya habwange, bwomi bwange buloho habwa kuheesya Kurisito kitinisa; kandi kakubba nkwa kikyoko kwiza kungasira hoj, habwakubba cali nkugyenda, nkugyenda kwicala na Kurisito biro byensej.

22 Beitu kandi, nyakeicala nindi mwomi kikyoko kwiza kumpa kuheereza hoj Yesu Kurisito. Kale nu, gya mu mananu tinkwega na kyakucwamwo mu bintu bibiri, kucwamwo kwomeera rundi kukwa.

23 Ndemeerwe kyakucwamwo mu bintu bibiri; nkwezegwa ninkwendeerya kimwej kugyenda kubba na Kurisito, kubba kikyoko kyokyo kikukiira kimwej burungi.

24 Beitu kandi, kili kintu kihandu hoj nti ncale nindi mwomi habwakubba mukwiza kubba nimukunyeetaaga kubaheereza.

25 Ndi munanuku nka kunkyegiri nti, ha kikyoko kintu kya kubba mwomi, nkugyenda kwicala nanywe nywensej aleke mu kwicala kwange nanywe, kwikiriza kwenyu na kusemererwa kwenyu mu Mukama weetu bihandire kimwej.

26 Makuru gaakyo nti, bundibba mbunjiirye kuromba nanywe musobore kusemererwa hoj habwa Yesu, Mutongoole wa Ruhanga kunziirya hali nywe.

27 Kintu kihandū mu byensei, mubbe na ngesu zikwolokya Makuru Garungi ga Yesu Kurisito gamweikiriize. Mwakakora yatyo, mmbe ninkusobora rundi ntakusobora kwizayo kubawona, nkwiza kubba ninkusobora kwegwa bigambu bikwolokya mitima myenyu nywensei nka kumili ha kintu kimwei. Kandi bumwei bubwō, bwobwō bukwiza kubaha kubba hamwei mu kwemeera ha bigambu bikukwatagana na Makuru Garungi.

28 Kandi muleke kutijina babwo bakubagaana kutebya Makuru Garungi. Nywe butabatijina, kwiza kubba nikikuboolokya nti Ruhanga akwiza kuzikya babwo kubalwanisya beitu kandi naajuna nywe.

29 Kubba yo Ruhanga atakabahe mugisa gwa kwikiriza-bwikirizi mwibara Iya Kurisito, beitu yaabaheeri na gwa kuwonawona habwa kuheereza Yesu Kurisito.

30 Hati nu twenseenya, gya nanywe, tuli mu bulemu bwobwō bumwei bwa kuwonawona habwa kuheereza Kurisito, nka kumukwegwa, bubwō bulemu bwobwō ndimwo na hataati.

2

Kubba na Ngesu nka za Kurisito

1 Kale nu nka kumwiceeri nimuli batatiro habwa Kurisito, kandi naabahuumulyanga mu ngonzi zaamwe, naabaha kukoragana na Mwozo Musyanu na kugiirangana mbabazi,

2 munkoore bibi bintu byampa kusemererwa mu mutima gwange: Mubbe na nteekereza gyogyo gimwei, mwendyengenenge, kwicala

kwenyū kwolokyenge nka kumukoora hamweji na mutima gumweji.

³ Mutakoranga kintu kyenseji haḅwa kwendya kutunga byenyū nywe nywankei, rundi haḅwa kwendya kwetembya, bejtu mutwalenge bandi kubba bahakyendi kubakira.

⁴ Muleke kubba bantu beeteekerezaho bo bankei, bejtu beira beenyū nabo mubateekerezengeho de.

⁵ Kandi kuteekereza kwenyū kubbenge nka kukwo kwa Yesu, Mutongoole wa Ruhanga kuyaalingi nakwo:

⁶ Nahuyaakabba yaali na buhangwa ḅwa Ruhanga* ataketwale kubba ha lulengo lumweji na Ruhanga,

⁷ bejtu yaabundejiri yeezirya kubba wa hansi, yaabba nka mwiru, yaabyalwa mu kisisanji kya muntu.

⁸ Kandi mukwiza kwamwe mu kisisanji kya muntu, yaabundejiri hoji kudwa ha kwikiriza kukwa, baamwita nka mwiti ha musalaba!

⁹ Nahabwakikyo Ruhanga yaamubyokeerye hakyendi hoji yaamuha ibara likukira mabara gandi genseji,

¹⁰ aleke yogwo yenseji ali mu nsi na mwiguru, na yogwo ali hansi kuzimu mu bakuu, bwalyegwanga lilyo ibara lya Yesu akundenge malu naamuramya.

¹¹ Kandi nti, bantu benseji ba ndimi zenseji baatulanga nibeikiriza nti Yesu Kurisito ali

* **2:6 2:6** Bbajbbuli zindi zikoresya: *Mwana wa Ruhanga.*

Mukama, habwa kuheesya Ruhanga Bbaa weetu kitiinisa.

Ngesu za Beikiriza zoozo Kyererezi

¹² Kale nu nywe beikiriza banywani bange, nka kumubanga nimuhondera bigambu byange binyaabeegeseerye, kwokwo yatyo mubihonderenge na kukira maani hataati buntali nanywe. Mwekambe hoj mu mitima myenyu kubba na bikorwa bikwolokya ngesu za kujunwa kwa Ruhanga kuyaabajuniri.

¹³ Kubba Ruhanga yogwo akoora muli nywe, yooyo akusobora kubasoboresya kubihondera na kubaha mutima gwa kwendya kukora bintu yo biyendya.

¹⁴ Mukorenge bintu byensej mutalinamwo kiteekerezu kya kwenurunuuya, rundi kya kukuuta mpaka.

¹⁵ aleke mutabba na muntu yensej akubabazaho kubiibi. Mwicala nimuli bantu basyanu, batali na kakuu nka baana ba Ruhanga batali na kintu kyensej kibiibi, ngesu zeenyu ziicalenge nizaaka-hwaki nka kyerezezi kya nzota za mu mwanya kumuluka hubiibi bwa bantu ba muhihi gugu nka kubuli hubiibi hoj.

¹⁶ Muweere bantu ba nsi kigambu kya Ruhanga kya hwomi, humulikakora kikyoo nkwiiza kubba nindinaho kyakwesugusya ha kiro kikyoo kya Kurisito kyalijiramwo, nti nagya maani gange gatakagyendere husa.

¹⁷ Bejitu nabubaakanzita nka kyonzira[†] kihhebeerweyo, ibbanga lyange lilyo na

[†] 2:17 2:17 Bbajbbuli zindi zikoresya: kyonzira kya byakunywa.

kuheereza kumukuheereza Ruhanga, bikwiza kubba nibili bihongwa bimuheeriyo hali yo bikwolokya nka kumumwikiririzamwo. Nkwiza kusemererwa hoj hamwej nanywe nywensej bunyaakakwa nkabba kihongwa nka kunyeeheeriyo kubba.

¹⁸ Nahabwakikyo, muli na kusemereerwa, naga ndisemererwa hamwej nanywe.

Timiteo n'Epafurodito

¹⁹ Mukama weetu Yesu Kurisito yaakabba akisimiri, nkunihira kubasindikira Timiteo mu busumi butali hwa hadei, aleke naga mbe na kusemererwa mu mutima gwange bunyaakeegwanga makuru ga kubafaaho.

²⁰ Habwakubba tindi nayo muntu wondi yensej akusobora kubba wa mugasu hali nywe nka yo.

²¹ Baba bandi bensej bafaaho bintu bikubakwataho bisa, beitu biyo bikukwatagana na Yesu Kurisito tibabifaaho.

²² Mukyegiri Timiteo nka kwali muntu wa ngesu zisimiriwe, habwakubba aheereize hamwej naga mu kutebya Makuru Garungi nka mwana yensej na bbaawe kubabba.

²³ Nahabwakikyo, nkunihira kumubasindikira heinyuma gya kasumi katali ka hadei, bunyaakeetegereza bintu byange nka kubikwiza kumalika.

²⁴ Kandi, ndi na kunihira nti heinyuma gya kasumi kadooli naga nyankei, Mukama weetu yogwo kwiza kubba nansoboresya kwizayo.

²⁵ Beitu kandi gya nkuteekereza nti nkusemeera kubasindikira Epafurodito,

mwikiriza mwira wange, muheereza mwira wange kandi mulwanj mwira wange yogwo alwanjiri Makuru Garungi gakukwatagana na Yesu Kurisito, kandi mukwenda weenyu gimwansindikiri ampeereze.

²⁶ Mmusindikiri eireyo hali nywe habwakubba ali na bihika binene byakubawona, kandi akwegwa naali na hujune habwenyu kusigikira ha makuru gaamwegwiri nti yaahimbiri.

²⁷ Mu mananu yaahimbiri hoj, yaadwa kubba nka muntu yaakwa. Beitu Ruhanga yaamusaasiri, kandi atakasaasire yo musa, nagyade yansaasiri aleke nteezegwa nindi na kusaalirwa kunene kukiryaho kukwo kunyaalingi nakwo.

²⁸ Nahabwakikyo, ndi mu kumusindika mu kasumi katali ka hadei eireyo hali nywe aleke nanywe musemererwe humwakamuwona murundi gundi, kandi nkwi za kubba ntali na kusaalirwa kunene.

²⁹ Kale nu mumutangjire nka mwikiriza mwira weenyu na kusemererwa kunene, kandi badulu nka babwo mubatengemwo kitinisa.

³⁰ Habwakubba yogwo mudulu yaali mukwi naali ha mulimo gwa Kurisito, naakukwera kumpeereza mu bintu nywe bimwalingi mutakusobora kukora habwa butabbaho.

3

Muleke Kwesiga Ngesu za Mubiri

¹ Kikusembayo, beikiriza beira bange, musemererwe habwakubba Mukama weetu

ali nanywe! Nkwegwa ntajwahiri kubaweera bintu byobyobyo bimwei binyaabaweereeriho mu kasumi keinyuma, habwakubba biyobyoby bintu bili na kibikubagasira.

² Mwerinde bantu banyangesu zibiibi, babwo banyangesu zikwisana za mbwene, mubeerinde babwo bakubahambiriza musalwe.

³ Twetwe bantu banyakusalwa mibiri kwo, hatali babwo bakubasala; habwakubba twetwe bali na Mwozo wa Ruhanga atuha kuramya Ruhanga. Twetwe babwo beesigira kimwei Yesu, Mutongoole wa Ruhanga kandi babwo bateesiga bikorwa bya mubiri,

⁴ kadi nagya nyankei, nabunyakabba nyaali ninkusobora kubba ninyeesiga bikorwa bya mubiri kubba nibingasira.

Hakabba nihaloho bantu bakuteekereza nti bo bali na nsonga gikubaha kwesiga bikorwa bya mubiri, tihaloho muntu yensei akubinkirya.

⁵ Nyaasalirwe heinyuma gya biro munaanei maari kubyalwa, mmba Munyeisaleeri wa mulula lwa Bbenyamijini, mmba Muhebburaniya munyakubyalwa Bahebburaniya. Ha bikukwatagana na kuhondera biragiroy bya Musa, nyaali Mufalisaayo;

⁶ ha bikukwatagana na kwekamba kukora bya Ruhanga biyendya, nyaahijaniize hoji kitebe kya beikiriza ba Yesu ninkuteekereza nkukoora Ruhanga; ha bikukwatagana na kuhondera biragiroy bya Musa, tindi na kiragiroy kyensei kinyaabiniriji.

⁷ Beitu byo biyobyoby byensei binyaakatwalengi kubba nibili bya mugasu hali gya, mbiwona nka

bitalimwo kuruga hunyetegeerije Kurisito.

⁸ Mu mananu, biby bintu byensei mbiwona nka bitalimwo humbilengesania na kikyo kya mugasu hoj kinyaatungiri kya kwega Yesu, Mutongoole wa Ruhanga, Mukama wange. Nyeeferejeze bintu byensei hawamwe; nyaabitwala kubba nka bisasiro aleke mmwetegereze

⁹ kandi mmbe muli yo. Nkwendya kwahi kubba ninkubalwa akusimwa mu meiso ga Ruhanga hawwa kuhondera biragiyo bya Musa, beitu nkwendya kubba ninkubalwa akusimwa mu meiso ga Ruhanga kusigikira hali Kurisito ginyeikiririzemwo, kukwo kwokwo kusimwa kubalwa kubba kwa Ruhanga hawwa kwikiririza mu Kurisito.

¹⁰ Kinkwendya hoj kwokwo kwetegereza Kurisito, na kwetegereza gagwo maani ganyakumuhiboolo kuruga mu bakuu, na kuwonawona nka yo kuyaawonaweeni, na kukwa nka yo kuyaakwiri,

¹¹ aleke mu mulingo gwensei, nagya de nso-bore kuhimbooka kuruga mu bakuu.

Paulo Niyeekamba Kugyenda mu Meiso

¹² Nkukoba kwahi nti biby bintu byensei mmaari kadei kubitunga, kandi nti mmaari kadei kubba kikyo kya Ruhanga kyakwendya mmbe, beitu nyeekamba kugyenda mu meiso aleke ntunge kisembu kya hwomi hwa mwiguru hawwakubba kikyo kyokyo Yesu, Mutongoole wa Ruhanga, kiyantegekeeri buyankomiri kubba mwikiriza waamwe.

13 Beikiriza beira bange, gya habwange tin-kuteekereza nti mmaari kudwa ha kutunga kikyoo kisembu. Beitu kintu kimweji kinteerihoo mutima gwange kyokyo: kwebeera byeenyuma nakwekamba kugyenda mu meiso.

14 Ndi mu kwekamba kugyenda mu meiso aleke ndwe ha kutunga kikyoo kisembu kya Ruhanga kiyanzeteeri kuraba mu Yesu, Mutongoole waamwe.

15 Kale nu, twe twenseji bahandiri mu kigambu kya Kurisito tukusemeera kubba na biteekerezu byobyo bimweji ha biyoo bintu bimbazirihoo. Beitu hakabba nihaloo bamweji muli nywe bantu bali na biteekerezu bikwahukana nabyo, Ruhanga akwiza kubeetegereseya de.

16 Beitu twe, tugyende mu meiso na kukwatira kimweji gagwo mananu gatwegesebeerwe.

17 Beikiriza beira bange, nywenseji hamweji ngesu zeenyoo zibbenge nka zange, kandi mwegere hali babwo bakuhondera zizo ngesu zirungi zitwaboolokeerye.

18 Habwakubba, mirundi minene ninkibaweranga, na hataati de nkukibaweera na maliga mu meiso gange nti, haloo bantu banene ba ngesu zaabu zibaheeri kwicala nka banyanzigwa ba musalaba gwa Kurisito.

19 Babwo bantu mmaliira gyabu kuli kugyenda mu Geehena. Habwakubba baranya bidyo bya nda zaabu kandi beesugusya bintu bikusemeera kubakwatinya nsoni. Mitima myabu miicala ha bintu bya mu nsi.

20 Beitu kandi twe, iguru cali Mukama weetu Yesu Kurisito eicala hooohoo kwamwetuu. Kandi

yogwo Kurisito Mujuni weetu yooyo gitulindiriri kuruga mwiguru.

²¹ Yooyo yogwo alihindula mibiri myetu mimi mya ha nsi naamifoorā mya kitinisa nka gwamwe naakoresya gagwo maani gaamwe gamusoboresya kufuga bintu byensei bya mu nsi.

4

¹ Kale nu, beikiriza beira bange, nywe beicala ku mwozo gwange kandi bandimukwendya kuwona murundi gundi, habwakubba mumpeeri kubba na kusemererwa mu mutima gwange, na kondo ginditunga ndigitunga habwenyu. Nahabwakikyo mukwatire kimwei Mukama weetu yogwo gimweikiririzemwo!

Kulamba

² Nkukwesengereerya we, Eyudiya, nawe Sintike, mwezirengemwo habwakubba nywensei muli beikiriza ba Mukama weetu.

³ Kandi we, muheereza mwira wange ginyeesiga, nkukusaba oteeranize babwo bakali babiri beicale mu humwei, habwakubba baakoori mulimo gwa maani mu kutebya Makuru Garungi nanya hamwei na Kelementi na baheereza beira bange bandi ba mabara gaabu ganyakuhandiikwa mu Kitabbu kya bwomi.

⁴ Musererwenge mu Ruhanga; kankibaze murundi gundi: Musererwenge!

⁵ Muleke bantu bensei bawonenge kubundaara kwenyu. Kasumi ka Mukama weetu kwira kali heehi!

6 Muleke kwelalikiira kintu kyensei, beitu mu bintu byensei musabenge Ruhanga. Mumuweerenge byetaagu byenyu nimumwesengereerya na kusijima mu mitima myenyu.

7 Bubwo mwomwo, businge bwa Ruhanga bukukira kwetegereza kwensei, bulibalinda mu mitima myenyu na biteekerezu byenyu mu Yesu, Mutongoole wa Ruhanga.

8 Beikiriza beira bange, nkumaliira ninkoba, mutenge mitima myenyu ha bintu bya mananu, bya kitinisa, bibyo bikusimwa mu meisoga Ruhanga, bisyanu, bibyo birungi bikwegombwa, na ngesu zirungi. Muteekerezenge hali birungi bikukiirayo kimwei na bibyo bikuhaariizibwa.

9 Mutenge mu nkora bibyo byensei binyaabeegeseerye na bibyo binyaabaragijiri kukora kuruga mu bigambu byange na mu bikorwa byange, aleke Ruhanga yogwo atuha businge eicale nanywe.

Paulo Naasijima Bisembu bya Bafiripi

10 Nkwegwa nindi na kusemererwa kunene mu Mukama weetu habwa mitima myenyu kukwatwaho murundi gundi, heinyuma gya kasumi kalei, nimukabunja kunsagika. Mu mananu bibyo biro byensei mubbanga nimunteekerezaho, kutoolaahona nti mutakabbe na mugisa gwa kulyolokya.

11 Mutateekereza nkubaza yatyo habwakubba nti, ndi na kintu kyensei kinkwendya kuruga hali nywe, kubba gya nyaadoori hakwetegereza

kubbanga na businge mu mutima gwange mu mbeera zensei.

¹² Ndi na kinyeegiri ha bikukwatagana na muntu kubba naho na kubba atalinaho. Mu mbeera zizo zensei, ncala na kya nsita kya buteetaaga kintu kyensei kinyeetegeeriize, kimpa businge mu mutima gwange mu bwire bwa kubba na bidyo rundi bwa nzala, bwire bweitungo rundi bwa nnaku.

¹³ Habwakubba gya nkusobora kukora bintu byensei kuraba mu yogwo Kurisito ampa maani.

¹⁴ Beitu nabwo, mwanzolokeerye mbabazi bumwanzirukiriri ha bwire bubwo bwa bujune bunyaalingimwo.

¹⁵ Kandi nywe beikiriza ba Filipi mukwega kurungi bintu nka kubyali hali nyaatandikiri kutebeerya Makuru Garungi mwisaza Iya Makedooni. Bunyaarugiri Makedooni, tihaloho kitebe kindi kyensei kya beikiriza kinyakubba na nkoragana gya kumpa bintu,* kutoolaho gana kyenyu kisa.

¹⁶ Nabunyaali mu Sosolonika, nindi na bintu binkwetaaga mwantwekeeri bintu mirundi minene.

¹⁷ Mbaziri bibi bigambu ntakumanyisya nti ndi na kintu kinkubendyaho, beitu kinkwendya kili nti, nanywe Ruhanga abahe mugisa habwa biyo bintu bimwansagikiri nabyo.

¹⁸ Kubba gya bintu byensei ndi nabyo, kandi ndi nabyo mu bunene hoj; hataati na bibi bisembu bintungiri by'Epafurodito andeeteeri

* **4:15 4:15** Bbaibbuli zindi zikoresya: *Nywenywe basa banyaakubagana nagya magoba na kufeerwa.*

kuruga hali nywe, ndi na bintu bikummala. Bibyo bisembu byenyu bimumpeeri bimbereeri nka kihongwa kya Ruhanga kiyendya, kikuwunya kurungi kandi kimusemereeri.

¹⁹ Kandi Ruhanga wange yogwo yooyo alibaha bintu byensei bimukwendya kusigikira ha kitinisa kya huguuda bwamwe mu Yesu, Mutongoole wa Ruhanga.

²⁰ Ruhanga yogwo Bbaa weetu aheebwenge kitinisa biro byensei. Amiina.

Paulo Naaraga Beikiriza ba Filipi

²¹ Mundamukiirye bantu ba Ruhanga bensei babwo beikiririza mu Yesu, Mutongoole wa Ruhanga. Kandi beikiriza beira bange babwo bampeereza nabo babaramukiirye.

²² Bantu ba Ruhanga bensei babaramukiirye kukira maani babwo baheereza ba mu kikaali kya mukama wa Buruumi.

²³ Nkubasabira mbabazi za Mukama weetu Yesu Kurisito ziicale na myozo myenyu. Amiina.

Ndagaanu Gihyaka
Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 18 Apr 2025 from source
files dated 29 Jan 2022

b2d1b010-ce36-53f8-94bb-ea31f34239cc